


11



蘇州府

在南京西
南六百里

領一州七縣

本荆蠻之域周泰伯讓國來奔居今無錫縣之梅里始號句吳釋名曰句者夷俗之發聲吳虞也封泰伯於此以虞其志也從泰伯至吳子壽夢十九世當魯成公時盛大稱王諸樊徙闔閭築城都之今郡城是也秦始皇二十六年置會稽郡治吳縣漢順帝永康四年分浙江以西爲吳郡隋開皇九年改置蘇州以姑蘇山爲名宋開寶八年置平江軍節度尋爲平江府 國初破張士誠仍復蘇州之名○自泰伯稱句吳以來漢書項羽傳舉吳中

兵則稱吳中灌嬰傳破吳郡長吳下則稱吳下唐
李德裕指爲吳之門戶則稱吳門又古昔有吳會
之語諸葛孔明云東連吳會曹子建詩云行行至
吳會今郡有吳會亭是也又有三吳之說酈道元
水經注云永建中陽羨周嘉上書以縣遠赴會至
難求得分置遂以浙江西爲吳東爲會稽分而爲
三號三吳卽吳興吳郡會稽也晉書咸和三年蘇
峻反吳興太守虞譚與庾冰王舒等起義兵於三
吳是時冰爲吳郡舒爲會稽則是以吳郡吳興會
稽爲三吳矣陸廣微吳地記以金陵爲中吳鄂州
爲南吳武昌爲下吳此本孫吳所規制而言杜佑
通典元和郡國志以吳郡丹陽義興爲三吳則在
隋立蘇州以後耳今之三吳踵此○越絕書云今
太守舍者春申君所造後殿屋以爲桃夏宮今宮
者春申君子假君殿也太守府大殿者秦始皇刻
石所起至更始元年太守許時燒之六年十二月
鑿官池東西十五丈七尺南北三十丈吳宮至秦
猶存守宮吏以火視燕窟遂火馬朱買臣載故妻
到太守舍猶卽此地按自唐乾寧元年刺史成及
建大廳宋初爲平江節度使治所紹興初高宗將

駐蹕平江先命漕臣於府治營造宮室三年行宮
成四年移幸七年三月詔賜守臣復爲府治元初
置宣撫司後改總管府府官皆居外私宅聽訟決
遣則會治所後多頽圯惟黃堂木蘭堂齊雲樓宣
詔頒春二亭存至正末張士誠據爲太尉府及敗
縱火焚之惟存子城南門○黃堂卽春申君子假
君之殿也後太守居之爲數失火塗以雌黃遂名
黃堂或曰以黃歇之姓而名細素雜記云古者太
守所居黃堂猶三公之黃閣也天子曰黃闈三公
曰黃閣給事舍人曰黃扉太守曰黃堂但今海內
郡治惟蘇州府堂扁額黃堂二字必有所本○木
蘭堂又名木蘭院後人以州宅後堂名之風齋錄
云唐刺史張搏於堂前植木蘭花當盛開時宴郡
中詩人卽席賦詩陸龜蒙後至張連酌之徑醉彊
執筆題兩句云洞庭波浪渺無津日日征帆送遠
人頽然醉倒張命他客續之皆莫詳其意旣而龜
蒙稍醒援筆卒其章曰幾度木蘭船上望不知元
是此花身遂爲一座絕唱志云白樂天爲刺史嘗
於此教霓裳舞其去任後有寄題木蘭院詩卽此
宋范仲淹詠古絕句堂上列歌鐘多慙不如古却

茨木蘭花曾見霓裳舞○齊雲樓在郡治後卽古
月華樓吳地記云唐曹恭王所范蓋取西北有高
樓上與浮雲齊之義宋治平中裴煜改爲飛雲閣
政和五年復舊名白居易齊雲樓晚望燕倒宦情
盡蕭條芳歲闌欲辭南國去再上北城觀複疊江
山壯平鋪井邑寬水光紅漾漾樹色綠漫漫約略
畱遺愛殷勤念舊歡病拋官職易老別友朋難九
月全無熱西風亦未寒齊雲樓北面半日凭闌干
○北池唐時在木蘭堂後池中爲鴨鴨上有白公
手植檜宋蔣堂記云姑蘇北池其來古矣刺史韋
應物詩海上風雨至逍遙池閣涼卽其地也白公
亦有池上之作○城邑攷云府城卽闔閭故城周
敬王六年吳闔閭時子胥謀國相土嘗水象天法
地以築大城周廻四十二里三十步小城八里二
百六十步開陸門八以象天之八風水門八以法
地之八卦封其名皆子胥所制東曰婁曰匠西曰閭
曰胥南曰盤曰蛇北曰齊曰卒吳都賦云通門二
八水道六衢唐劉禹錫詩二八城門開道路許渾
詩共醉八門回畫舸是也隋楊素時曾徙之橫山
東今呼新城唐武德末復還舊城乾符三年王郢

之亂刺史張搏重築朱梁龍德二年始以甄瓿之
 宋嘉定間丞相史彌遠奏賜錢粟修治為江南一
 路城池之最然宋初惟有閭胥盤封婁齊六門後
 加為八門 我朝于八門之外加有封赤二門共
 為十門周三十四里有五十三步城內大河三橫
 四直形如亞字○閭門取象天門通閭闔風也闔
 問欲破楚楚在西北故立閭門以通天氣又名破
 楚門史傳中多書作昌門或謂春申君諱破楚之
 名故改昌門又謂之望齊門以孔子登東山望吳
 閭門者也又謂夫差謀伐齊登此門望其形勢故
 名○吳越春秋云闔閭女字勝玉王與夫人及女
 會食蒸魚王前嘗半而與女女謂辱我乃自殺闔
 問痛之葬於閭門外而舞白鶴於市令民隨觀使
 男女與鶴俱入羨門發機掩之取土時其地成湖
 號女墳湖○閭門內有臯橋漢議郎臯伯通居其
 側平陵梁鴻因避肅宗之求挈妻子易姓名依之
 居廡下伯通察而異之因舍于家卒為葬之要離
 塚傍漢書注云要離墓在西伯鸞墓在北俱傍閭
 門城南唐陸龜蒙謂梁鴻墓去金昌亭一里晉陸
 機詩閭門勢嵯峨飛閣跨通波唐吳紳詩烟水吳

蘇州府志附卷之九

都郭閭門架碧流韋應物詩獨鳥下高樹遙知吳
苑園淒涼千古意日暮倚閭門○胥門一云姑胥
門越絕書云外有九曲路闔閭從此遊姑胥臺蓋
取爲名圖經以伍子胥家於此後因直諫被誅抉
目懸之門上故以名之按子胥云懸目東門而此
門在西又門之名皆子胥所命亦不應以已名爲
名也越絕書所云近是越伐吳吳王在姑蘇越因
於胥門外築城以逼之名越城今其基髣髴猶存
○後漢蔡經家居胥門尸解十餘年忽歸詎家人
曰王君方平七月七日當來至期果至引見經父
母兄弟因遣人召麻姑頃之麻姑至乃好女坐定
因各進行厨皆玉食擘麟脯相勸酬今蔡仙鄉卽
其隱處唐張籍宅亦近胥門有詩贈陸暢云共踏
長安街裏塵吳門獨作未歸身胥門舊宅今誰住
君過西塘與問人○盤門吳地記云舊曰蟠門蓋
嘗刻木爲蟠龍以厭越也又以水陸縈廻屈曲改
字爲盤嘗有龍潛伏於此以鼓仗擊逐之卽今五
樓門是○塚廟記云盤門內有吳大帝武烈廟載
在祀典東北二里有後漢破虜將軍孫堅討虜將
軍孫策二墳○赤門以南面屬火方故名今南城

下有大溝外濠之水從此入祝橋以出燕家橋古赤門水道也盤葑二門之間有赤門灣圖經云赤門外有澹臺湖近東有赤欄將軍墳○蛇門在巳方吳越春秋云闔閭立蛇門以象地戶欲并越故立此以制之吳地在辰其位爲龍故子城南門上反羽爲兩鯢繞以象龍角越在巳其位爲蛇故南大門上置木蛇北首向內示越屬吳也勾踐歸國夫差送于蛇門之外門上爲龍形勾踐入越作雷門以勝之漢梅福字子真爲南昌尉避王莽亂政弃妻子易姓名入吳後有人見福隱于市卒卽此門也○葑門原名示浦門近水塘吳地記云吳有葑田謂菱土糝結可以種殖也或謂取故永安縣封禹山名又名鱒鯀門史記正義闔閭城無東門俗傳伍員見夢越軍令從東南入越乃開渠自城東入名示浦門曰鱒鯀又伍員傳註亦云越開示浦子胥以濤蕩羅城開此門有鱒鯀隨濤入○匠門本名干將門吳地記云闔閭使干將於此置冶鑄劍故名今門外有干將墓歐冶廟或但云將門後訛爲匠此門水陸二路皆出海道沿松江下滬瀆今廢而婁葑之間尚有匠門塘云○齊門吳越

春秋云闔閭十年破齊齊以女爲質吳爲太子波聘之齊女少日夜號泣闔閭乃造此門令女往遊其上門東二里有廬江太守闕臻墳○婁門以直秦婁縣而名本名嚠門秦時有古嚠門至漢王莽改爲婁縣東南二里有漢吳郡太守朱梁墳本名趙避後漢和帝諱改爲梁今吳郡朱氏皆梁之後也唐陸績鬱林石在婁門內後屬之陸龜蒙明御史樊祉輦而致之院前吳中行爲記○平門水陸並出毗陵吳伐齊從此出軍故以平爲名今有平門塘一名巫門蓋以商臣巫咸葬此門東三里故

也或謂平巫字畫相近吳地記云吳子壽夢始別築城爲宮室于平門西北二里基址見存近城有吳偏將軍孫武墳○子城在大城內東偏相傳亦子胥所築周十二里越絕書云小城門三皆有樓其二增水門其一增柴路虞氏家記云小城白門闔閭所作秦始皇時守宮吏燭燕窟燒宮而門樓尚存其西者爲西樓後名觀風樓唐時名望市樓元微之寄白樂天云弄潮船更曾觀否望市樓還有會無○漢唐宋皆以子城爲郡治元末張士誠時建太尉府繼經敗燬城圯略盡今獨存頽垣上

置官鼓司更郡人呼爲鼓樓城四面舊有壕世傳
吳王嘗作錦帆以遊名錦帆涇其西北有乘魚橋
昔琴高跨鯉升仙之地或云宋子英也白居易西
樓夜宴詩留春不住登城望惜夜相將秉燭遊風
月萬家河兩岸笙歌一曲郡西樓詩聽越客吟何
苦酒被吳娃勸不休徒道人生都是夢夢中歡樂
亦勝愁明高啓詩橋上西遊人橋下東流水遊人
如水流朝暮何時已誰知有飛仙赤腳踏錦鯉左
招騎龍君右携乘鸞子笑殢紫雲英同歌珠宮裏

吳縣附郭

秦置縣屬會稽郡漢書項羽擊殺會稽假守通而
云遂舉吳中兵是會稽治吳縣矣沈約宋志云漢
順帝永建四年分會稽郡立吳郡治吳縣舊經云
王莽改名恭德東漢建武復舊名自秦漢時縣治
在子城東北打急路橋之東國初移建於府治
西北隅一里

長洲縣附郭

縣西南有長洲苑唐萬歲通天元年分吳縣之北
境置縣因以長洲爲名舊設府治後東北三里
國初移在府城東南隅一里烏鵲橋西縣雖次吳

然地里人民財賦長洲最大故稱曰長吳云臣佺

謹按圖經姑蘇山一名姑胥一名姑餘在吳縣西

北三十里史記正義云在西南三十里古姑蘇臺

置其上一名胥臺固闔閭作春夏遊焉又云夫差

作臺三年不成積財五年乃成造九曲路高見三

百里勾踐欲伐吳於是作柵楣嬰以白壁鏤以黃

金狀如龍蛇獻吳王吳王大悅受之以起此臺唐

李紳詩越王巧破夫差國來獻黃金重雕刻正詠

此事口越絕書云闔廬造九曲路以遊姑胥臺又

於臺上別立春宵宮為長夜之飲作天池以泛青

龍舟與西施為嬉子胥諫不聽曰吾見麋鹿遊于

姑蘇之臺也後越伐吳吳太子友戰敗遂焚其臺

唐任公叔崔鷄皆有賦文多不載李白烏棲曲姑

蘇臺上烏栖時吳王宮裏醉西施吳歌楚舞歡未

未畢青山欲銜半邊日銀箭金壺漏水多起看秋

月墜江波東方漸白奈樂何曹鄴詩吳宮酒未消

又宴姑蘇臺美人和淚去半夜閨門開相對正歌

舞笑中間鼓鼙星散九重門血流十二街一去成

萬古臺盡人不回時聞野田中拾得黃金釵○橫

名又名踞湖山以山臨太湖若箕踞然錢氏堊忠
獻王元璠其處因建薦福寺於山趾又名薦福山
山有五塢又名五塢山續圖經云此山鎮郡西南
臨湖控越實吳之要地隋楊素遷郡治於此亦以
是爲屏蔽云○城邑攷云魚城在橫山下吳王遊
姑蘇築以養魚續圖經云吳王控越之地本名吳
城方言謂魚爲吳乃誤稱耳今山傍有岡隱隱如
城周益公南歸錄云魚城在田間基厚而方其高
二丈博倍之爲田百二十畝土極細故久而不壞
元高文度詩谷變陵遷自古今耕人指點說魚城
綠波已涸無鷗鷺禾黍離離高下生○苦酒城在
魚城西南故老云吳王築以醜酒俗呼爲苦酒又
有酒城一名壇城一名陌城祥符圖經云在吳縣
東南三十五里夫差祭子胥處臨祭勸酒故名酒
城○鴨城吳王築以養鴨處東有稀巷以畜麋地
名沙里又東二里有豆園是吳王養馬處又有鷄
陂在豆園之傍相傳吳王畜鷄城也越絕書云鷄
陂墟闔閭所蓄鷄使李保養之明高啓鷄陂詩吳
妃不解報朝盈空養鳴鷄滿別城畢竟餘杭西走
日五更誰唱出關聲餘杭卽陽山詳見下○伍子

胥城麋湖城欏溪城巫欏城漢地志在吳縣今並屬長洲子胥城周九里二百七十步麋湖城者闔廬所置麋也欏溪城者闔廬所置船宮也巫欏城者闔廬所置諸侯遠客離城也麋洞內又有西城吳越春秋云西城者麋王城也與越王搖戰越殺麋王麋王無頭騎馬還武里乃死留葬武城中其死以午日至今武城午日不舉火○搖城本吳王子所居後越搖君居之今其地名大姚誤也○名山志云虎丘山在府城西北七里吳闔廬葬此穿土爲山發五郡之士十萬人共治千里使象運土鑿池四周廣六十里水深一丈五尺銅棺三重傾水銀爲池六尺黃金珍玉爲鳧鴈扁諸盤郢魚腸之劍在焉葬之三日金精上爲白虎踞墳故名虎丘劉向疏云闔閭葬十餘年越人發之但如空塚秦始皇求劍虎復蹲焉遂走而失或云墓卽虎丘寺法堂基也唐避諱改名武丘又名海湧峰遙望平田中大嶧耳比入則有奇勝其最者爲劍池兩崖劃開中涵石泉深不可測相傳始皇鑿山求劍無所得其鑿處遂成深澗今名劍池唐顏真卿書虎丘劍池四字刻於石上前有磐石爲千人坐乃

竺道生講經處其石盤陀徑畝高下平行可坐千人李陽冰篆生公講臺四字分刻四石今失其一臺側有點頭石上有可中亭取劉禹錫生公臺一方明月可中亭之語是山舊爲晉王珣及其弟珉別業咸和二年捨建寺時有僧曰竺道一者珣兄弟敬事之因隱於此顏真卿詩登壇仰生一謂道生道一也講臺之左有白蓮池相傳生公說法時池生白蓮花又有試劍石憨憨泉養鶴澗回僊徑石井泉卽張又新所品第三泉也吳郡志云劍池傍經藏後大石井面濶丈餘嵌巖自然上有石轆轤歲久湮廢寺僧乃以山後土井當之宋紹興三年主僧如壁始淘古石井去淤泥五尺許四傍有壁鱗皴天成下連石底泉出石脉中味勝劍池山下有短簿祠祀王珣以珣嘗爲桓溫主簿也當時諺曰髯叅軍短主簿能使公喜能使公怒卽此吳興太守褚淵嘗經遊其地淹留數日嘆曰今之所稱多過其實惟虎丘過於所聞劉宋何求何點何胤陳顧越唐史德義竝隱焉梁僧惠響天監中居此俯地側聽得甘泉今名虎跑泉又有真娘墓唐李紳詩序云真娘吳妓死葬虎丘寺前墓多花草

以蔽之陳張正見遊虎丘詩滄波壯鬱島洛邑鎮
 崇芒未若茲山麗岩堯擅水鄉重巖標虎踞九曲
 峻羊腸溜深澗無底風幽谷自涼柳沈餘玉氣劍
 隱絕星光白雲多異影丹桂有藜香遠看銀臺竦
 洞塔耀山莊唐顏真卿前題不到東西寺于今五
 十春揭來從舊賞林壑宛相親子多藏日秦皇
 厭勝辰劍池穿萬仞盤石坐千人金氣騰為虎琴
 堂化若神登壇仰生一捨宅嘆珣珉中嶺分雙樹
 迴巒絕四鄰客有神仙者於茲雅麗陳悠然千載
 後知我挹光塵張祐題虎丘寺雲樹擁崔嵬深行

異俗埃寺門山外入石壁地中開俯砌池光動登
 樓海氣來傷心萬年意金玉塋寒灰白居易題真
 娘墓真娘墓虎丘道不識真娘鏡中面惟見真娘
 墓頭草霜摧桃李風折蓮真娘死時猶少年脂膚
 美手不牢固世間尤物難留連難留連易銷歇塞
 北花江南雪宋米芾前題何不學仙塚纍纍白楊
 西郭陰風悲虎丘一叩真娘墓薜荔援牆蘭委露
 千歲蒙茸幾樹花夜飄鬼火曉啼鴉向憐挾瑟彈
 清月猶憶吹簫乘彩霞吳閭少年往來道黛娥釵
 燕誰能好酒滴春雲夢不消泉聲幽咽鐘聲老陌

上行遊緩緩歸昨日紅顏今日非東望闔閭穿堊處玉鳧欲化湛盧飛○唐大曆十三年虎丘寺有鬼題詩二首隱於石壁之上曰青松多悲風蕭蕭聲且哀南山接北山幽壠何崔嵬白日空昭昭不照長夜臺雖知生者樂魂魄安能迴其二曰神仙不可學形化空遊魂雖復隔幽壠猶知念子孫莊生問枯骨至樂徒虛言蘇門觀察使李道昌奏聞勅令致祭莫詳姓氏但稱幽獨君祭後石上復隱出一詩云幽冥雖異路平昔忝攻文欲知潛寐處山北兩孤墳今山北有二墳猶在○陽山一名秦餘杭山一名萬安山在城西北三十里高八百五十餘丈逶迤二十里以其背陰面陽故名又名四飛以四面視之勢若飛動也大峰一十五而箭缺爲絕頂相傳秦皇校射於此故其下有射瀆戰國策云越王以散卒三千禽夫差於干隧今萬安鄉有遂山卽其地也箭缺下有文殊寺寺內石井大旱不涸有白龍洞嶺西有龍母塚東北有白鶴山山峰有三如鶴之翥因產白塏亦名白塏嶺前有龍湫靈濟廟在焉宋新安胡偉廟碑略云東晉隆安中有繆氏家於是山之下其女始笄因出歸途

日暮欲雨忽遇白衣老人假館避雨語竟遽失老人所在今謂之龍塘卽此地也已有娠父母惡而逐之乞食於鄉踰年三月十八日產一肉塊棄之水中塊忽破有白龍出蜿蜒母前母驚仆地須臾雷電晦冥風雨交作良久開霽白龍復還產所視母已死乃飛騰而去於是鄉民葬其母仍建廟祀之每歲是日龍必歸省母見形或長尋丈隱顯於衆山或小如蜥蜴依伏於廟側暴風雷雨則其驗也紹興二十九年四月以祈雨有應賜今廟額

○徐侯山在陽山西北十里一名卑猶一名徐杭

左傳哀二十二年吳王乃縊越人以歸注云以其尸歸也越絕書夫差塚在猶亭西卑猶值近太湖越王令于戈人以一螺土葬之吳越春秋夫差既伏劍越王以禮葬之秦餘杭山宰伯詒亦葬其傍有義子墳十八所俱在陽山又有瓊姬墓者吳王女也與夫差墓相近明高啓瓊姬墓六言夢到夫差殿頭墮釵零落誰收土昏青鏡忌曉月冷珠櫺恨秋麋鹿昔來廢苑牛羊今上荒丘香魂若怨亡國莫與西施共遊○花山在陽山東南五里山石峭拔巖壑深秀相傳山頂有池晉太康中生千葉

蘇州府志卷之九 七 水

蓮服之羽化故名一云或登其巔見有狀如蓮華老子枕中記曰吳西界有華山可以度難疑卽此也山半有池在絕巘橫浸山腹逾數十丈名天池山上有石鼓并石屋二間四壁皆鑿浮圖像又有龜巢石秀屏虎跑泉蒼玉洞諸勝宋紹興中張漢卿居此因號就隱山明高啓遊天池山騎馬尋幽度嶺遲老僧不識使君佳門開紅葉林間寺泉浸青山石上池殘果已收猿食少枯松欲折鶴巢危壁間不用題名字無限蒼苔沒舊碑○龍池山在花山東南今改隆池○支硎山在龍池山東北吳都賦云古號臨硎盖山多平石故以硎名一名報恩山以古有報恩寺後因支遁居此改名支硎遁字道林初住剡東岬山後居報恩寺性好鶴又好養名馬山有石室寒泉遁詩云石室可蔽身寒泉濯溫手卽此支硎上爲寒山趙宦光隱焉自有記○土山在支硎西春申君治爲貴人塚高僧傳支遁在吳土山墓下集同志者合八關齋時白衣道士凡二十四人遁作詩三章○天平山在支硎南五里視諸山最爲齒萃而多奇石有卓筆飛來臥龍巾子諸峰又有五丈石毛魚池及大小石屋其

山頂正平曰望湖臺上有巨石圓而面湖者曰照湖鏡山半有白雲泉出泉如綫注出石罅味尤清冽南麓有白雲寺范文正公祖墓在焉其後羣石林立名萬笏林唐白居易題白雲泉詩天平山上白雲泉雲本無心水自閒何必奔衝山下去更添波浪向人間明楊基題照湖鏡詩團團山上石下照太湖影如何一鑑中三萬六千頃○金山者天平山之支壠也初名茶塢山晉宋間鑿石得金故易今名頂上盤石有坎澗三尺許長二丈餘深不可測水出瑩綠大旱不涸稱曰天池山腰有石橫偃於兩崖人行其下趾有阿育王塔方石池文殊菴東南為牛眠崦○秦臺山在天平之右與笏林比隣巔峰刻秦臺二大字相傳始皇遊會稽登此故名一名晨臺一名神臺其南則羊腸嶺右為白羊山嶺之南為赤山長可數里土石多赭色楊基題赤山舊事松稍吹紛落衣裳躑躅花開竹筍長可是山中朝洗藥一渠春水挾苓香○仰天山在赤山之東近天平不五里而近舊名馬鞍山宋范文穆公成大營墓於此以近天平山且慕范文正之為人故改今名○靈巖山在天平山之南一名

石鼓山山椒有石鼓鳴則有兵禍又名硯石山山
連磧村產石可爲硯也又有石馬望如人騎山椒
有琴臺硯池翫花池別有石池生葵蕪梁天監中
建秀峰寺於山上卽吳館娃宮故址寺成有異僧
負鉢囊入憩廡下長身鰲面梵相奇古其徒不之
省夜索筆圖其像於壁而去後日胡僧見之驚曰
此西土智積菩薩也唐宰相陸象先弟病得僧起
之自云靈岩僧後還吳見像知爲智積因建智積
菩薩殿元和初郡人馮生調選長安有老僧自稱
鑿師詣生曰汝吾甥也相與往來歲餘馮得東越

尉鑿師負笈告去曰我廬於靈岩寺之西廡久矣
遊長安忽十年今歸舊居君過此當訪我後馮生
詣寺詢之人無知者至西廡下有羣僧畫像其一
爲鑿師生大驚視其題云馮氏子吳郡人年十歲
學浮屠法以道行聞白樂天靈巖山詩娃宮屨廊
尋已傾硯池香逕又欲平二三月時但草綠幾百
年來空月明使君雖老頗多思携觴領妓處處行
今愁古恨入絲竹一曲梁州無恨情又題云館娃
宮畔千年寺水濶雲多客到稀聞說春來更惆悵
百花深處一僧歸杜牧前題吳王舊國水烟空香

逕無人蘭葉紅春色自憐歌舞地年年先發館娃
 宮口響屨廊相傳吳王建廊而虛其下令西施與
 宮人步屨繞之則響今靈巖寺圓照塔前小斜廊
 卽其址又有吳王二井一圓一八角唐吳鄴吳王
 井二首古宮荒井曾平後見說耕人又鑿開拾得
 金釵鐫勅字當時恩澤賜誰來 又含青薜荔隨金
 甃碧砌磷磷生綠苔莫言數尺無波水曾與此花
 同照來○玉遮山在陽山之南橫列如屏今但呼
 爲遮山舊志爲杏山其東爲雅宜山本名雅兒唐
 青州刺史張濟女雅兒葬此吳語兒爲傀因訛爲

宜或云虞集改今名傍有小山曰菽茹初名箬若如

近日掘地得唐元和十九年金氏墓志云葬於菽

茹山陽始知其訛或云卽雅宜山元倪瓚云雅宜

山舊名娜如山蓋元學士虞集所命然未若娜如

近古雅宜山之東則金井塢倪雲林有雅宜山齋

圖併詩云靈巖對植雅宜山穹林巨石臨蒼灣若

翁遁迹在其麓有子讀書長閉關松根茯苓煮可

握簷下慈烏去復還寫圖愛此錦步障白雲紅杏

春爛斑至正乙巳五月二十三日勾吳倪瓚畫賦

詩以紀歲月元鎮有娜如山竹枝歌娜如山頭松

蘇州府志卷之九

栢青闔閭城外短長亭來山未久入城去駐馬回
看雲錦屏 又 娜如山頭日欲西採香徑裡竹鷄啼
南朝千古繁華地麋鹿蒿萊望眼迷○錦峰山在
陽山西南產石紫赤色而膚理秀潤如錦宋兵部
尚書鄭起潛居此淳祐中理宗書錦峰二字賜之
山有昭明寺相傳梁昭明太子所建○鄧尉山在
錦峰西南屬光福里亦名光福山與玄墓銅坑諸
山聯屬按聖恩菴開山記作鄧蔚山在玄墓山之
南岡記作袁墓村蓋舊志以袁爲玄蔚爲尉而
村以山耳鄧尉山有顧野王硯池唐進士顧在銘
詩刻及七寶泉○銅坑山在鄧尉山西南一名銅
井晉宋間鑿坑取沙土煎之皆成銅故名上有巖
洞其懸溜漚而爲池清冽可飲名曰銅泉明張羽
詩牽屨陟雲崦想此盤陀石欲去更題名淋漓蘚
花碧定有樵夫來怪是蛟龍跡○玄墓山相傳郁
泰玄葬此在鄧尉山西南一名萬峰山以有萬峰
和尚開鑿而名山南面太湖遠見法華山如屏浮
於波面法華一名鉢盂一名烏鉢西南北三面皆
在湖中沿溪有虎山橋亦在亂山間而六水統其
下○穹窿山在太湖濱比陽山尤高紆回峻深形

蘇州府志卷之九

如釵股吳地記云二嶺相趨名曰銅嶺越絕書爲古赤松子取赤石脂處神仙傳赤鬚子豐人秦穆公魚史也食栢實石脂絕穀後往吳山升仙去卽穹窿山云山高而平其頂方廣可百畝中壘石爲龕名國師菴半山有泉名法雨四時不絕流下注石堰可以灌田山東嶺下有磐石高廣丈許相傳朱買臣讀書其上因名讀書臺穹窿寺在焉其北有紫籐塢百丈泉海雲菴宋熙寧間建元廣慧國初道衍皆居此僧史云廣慧初從訥公學文僧嶼者呵曰子才俊如此不思負荷大法甘作詩騷奴僕乎無盡燈燭所謂黃葉飄飄者作何見解慧不能答於是目不交睫者逾月忽見秋葉墜庭豁然有省遂大通宗貫有四會語錄若干卷道衍從文皇帝靖難卽姚孝廣也其題紫雲菴云歷歷春山裏曾崖倚曲房竹雲時駐影桂露夕團香未晚先垂瞑方秋已薦涼莫言全索莫自可勝他鄉又迢遞青村外崎嶇紫邏間過林纔見日到渡不逢山一室依巖險雙扉傍竹閒曾看雲際鶴向暮獨飛還○香山與穹窿連屬南近太湖爲胥口吳地

記云吳王種香於此使美人泛舟於溪以採之相

傳米香徑卽此自靈巖山南望一水直如矢俗名
箭涇○胥山在太湖口寰宇記云吳王殺子胥投
之於江吳人立祠祀之水經云胥山上有壇長老
以爲胥人所治下有九折路南出太湖闔閭闢以
遊姑蘇臺而望太湖今太湖口爲胥口其外爲胥
湖南有高峰山○楞伽山一名上方山在胥山東
北東南麓有丁家山唐人丁公著父喪負土作塚
于此其北爲寶積山又北爲吳王郊臺東北爲茶
磨嶼以其三面臨水故名東南麓有普陀巖巖前
石池深崖峻絕石梁跨其上兩岸壁立蘿木交映

白洋灣折北滙於楞伽山下曰石湖湖界吳縣吳
江之間相傳范蠡由此入五湖處山之東南有越
來溪與石湖通北至橫塘相傳越師侵吳自此入
也越城遶之雉堞宛然溪上有越城橋山上有楞
伽寺亦名上方寺寺有浮屠七級隋大業四年嚴
德盛撰銘按治平寺舊亦名楞伽吳郡志云寶積
寺在橫山下亦名楞伽山頂有塔今此寺自在楞
伽山上而寶積治平不可考豈皆一寺所分耶以
塔觀之則此爲是但碑中亦云橫山或當時未名
楞伽此固橫山耳張祐楞伽寺詩樓臺山半腹入

此一經行樹隔夫差苑溪連勾踐城上披松徑澁
 深坐石池清况是西峰頂淒涼故國情許渾前題
 碧樹蒼蒼茂苑東佳期迢遞路何窮一聲山鳥曙
 雲外萬點水螢秋草中門掩竹齋微有月棹移蘭
 渚淡無風欲知此路堪惆悵菱葉蓼花連故宮元
 姜夔除夜自石湖歸苕溪二首細雨穿沙雪半消
 吳宮烟冷水迢迢梅花竹裡無人見一夜吹香過
 石橋又桑間篝火却宜蠶風土相傳我未諳但得
 明年少行役只裁白紵作春衫○許墅在郡城西
 二十五里圖經云秦始皇求吳王劍白虎蹲於丘

上遂西走至此失劍而地裂為池因名其地曰虎
 膠至吳越時諱鏐因改許墅○白石山在許墅北
 越絕書云舊為胥女山黃歇徙封吳更今名又其
 南有小蜀山春申君客衛公子冢也○岸寧山在
 金山東俗稱獅子山一名鶴阜山又名岸雄山水
 經云吳西有岸嶺山山右有土阜曰鈴山左曰索
 山皆以獅子名山南頂上有巨石二如樓云是獅
 子兩耳吳地記云王僚葬此山南有落星涇其上
 為石巷及思益寺六朝時建○太湖在郡西南三
 十餘里其廣二萬六千頃東西二百里南北一百

二十里周五百里中有七十二峰襟帶蘇湖常三府北曰百瀆納建康常潤數郡之水南曰諸溇納宣歙臨安茗霅之水過吳江分爲二一自吳淞江二百六十餘里入海一自急水港五十里下澱山湖由港浦入海一名震澤尚書所謂震澤底定是也一名具區周禮揚州之藪曰具區山海經浮王之山北望具區是也一名笠澤左傳哀十七年越伐吳吳子禦之笠澤是也一名五湖史記范蠡乘舟出五湖口太史公登姑蘇望五湖是也張勃吳錄云五湖者周行五百里故名虞仲翊云太湖東通長洲松江南通烏程霅溪西通義興荆溪北通晉陵太湖東連嘉興韭溪水凡五道故名陸魯望云太湖上稟咸池五車之氣故一水五名然今湖中亦自有五名曰菱湖游湖莫湖貢湖胥湖自莫釐山之東與徐侯山相值者中爲菱湖相傳吳王於此種菱故名莫釐之西北與菱湖相連者爲莫湖南連莫湖東逼胥山者爲胥湖長山之西北連無錫老岸曰貢湖洞庭實錄云禹治水曾駐此故名長山之東曰游湖又云禹治水時風濤甚厲有二虬龍負舟而過其後以吳王嘗於此游玩故名

遊湖吳地記云五湖卽太湖東岸五灣蓋古時應別今混爲一矣五湖之外又有三小湖扶椒山東曰梅梁湖吳時進梅梁至此舟沈失梁至春首則水面生花杜圻之西魚查之東曰金鼎湖昔吳王泛舟五湖有金鼎沈于此物類相感志云震澤有金鼎湖每天將雨有墨浮水面頃之雨至以此爲常林屋之東曰東臯湖而吳人但稱爲太湖宋鮑照東望震澤瀾漫洞庭波合沓嶢嶂雲漲島遠不測岡澗近難分幽篁愁暮見思鳥傷夕聞以此藉沈疴棲迹別人羣唐薛據泊震澤口日落草木陰舟徒泊江汜蒼茫萬象開合沓聞風水洞汭值漁翁穿窬逢樵子雲開天宇靜月明照萬里蚤鴈湖上來晨鐘海邊起張祐題洞庭南館一逕逗霜林朱闌繞碧岑地盤林屋口山鎮洞庭心樹白看烟起沙明見日沈還因此悲屈惆悵又行吟○三江者松江婁江東江也禹貢三江旣入史記正義曰三江在蘇州東南三十里名三江口一江西南上七十里至太湖曰松江古笠澤江一江東南上七十里至白蠟湖曰上江亦曰東江一江東北下三百餘里入海曰下江亦曰婁江其分處號曰三江

口吳地記云松江東北行七十里得三江口東北入海為婁江東南入海為東江并松江為三江今之三江一自太湖從吳縣鮎魚口北入運河經郡城之婁門者為婁江一自太湖從吳江縣長橋東北合龐山湖者為松江一自大姚分支過澱山東至嘉定縣界合上海縣黃浦由黃浦經嘉定江灣青浦東北流亦名吳松江者為東江其實皆太湖之委也三國時郡人葛玄從吳王船行至三江口阻風船多漂沒玄船亦沈吳王遣人求之忽見玄從水上行來衣履不濕而有酒容言曰臣從吳子

胥邀飲淹屈陞下於此○洞庭山在太湖中以有金庭玉柱故名洞庭有東西二山西洞庭周八十八餘里上有居人數千家一名林屋山以有林屋洞一名包山以山四外皆水包之真誥云去洞庭見包公問動靜則又以包公居此而名左太冲賦云指包山而為期集洞庭而淹留是也東洞庭周五十餘里亦有居人數千家一名莫里山相傳隋莫釐將軍居之一名胥母謂子胥嘗迎母於此其勝與西洞庭埒所產亦同而差異者西石青而潤東石黃而燥西宜梨東宜枇杷西有兔無雉東有雉

無兔西洞庭之峰縹緲最高東洞庭之峰莫釐最
 高西洞庭之石多因波濤激齧而為玲瓏浸濯而
 為光瑩東洞庭石多出山上天然嵌空非盡由水
 春也白樂天品牛僧孺家太湖石為甲乙丙丁四
 等自為記宋徽宗朝朱勔希旨取進窮工極巧上
 大悅勅封磐固侯唐劉禹錫詩震澤生奇石沈潛
 得地靈初辭水府出猶帶龍宮腥從風夏雲勢上
 漢古杳形徒然想融結安可測年齡○林屋洞在
 西洞庭即道書十大洞天之第九一名左神幽虛
 之天洞有三門同會一穴一名雨洞一名暘谷一
 名丙洞中有石室銀房石鐘石鼓金庭玉柱白芝
 金沙龍盆魚穴乳泉石燕有石門名隔凡郡國志
 洞有五門東通林屋西達峨嵋南接羅浮北連岱
 嶽東有石樓樓下兩石扣之清越所謂神鉦也昔
 闔閭使靈威丈人入洞秉燭晝夜行七十日不窮
 而返啓王曰初入洞口甚隘偃僂而入約數里忽
 遇一石室高可二丈常垂津液內有石床枕硯石
 几上有素書三卷持回上於闔閭不識使人問孔
 子孔子曰此禹石函文並神之事言大道也王
 又令再入經二十日却返云不似前惟上聞風浪

蘇州府志卷之九

七

同

聲又有異蟲撓人撲火石燕蝙蝠大如鳥前去不
得穴中高處照不見頂左右多人馬跡昔禹治水
過會稽夢人衣玄纁告以治水法云在山北鈿函
中弁不死方禹得之藏於包山石室靈威丈人所
得者是也玄中記云句曲山有靈府洞庭四開古
人謂為仙壇之靈區天后之便闕清虛之東窓林
屋之隔沓衆洞相通天后者林屋洞之真君住太
湖包山下婁地記云太湖東小山名洞庭純石巉
巖木惟松栢有三穴一穴不容人有清泉流出面
北一穴如堂屋上高丈餘恒津潤四壁石色青白

南壁開處僅容側有潜行二道北通瑯琊東武西
通長沙巴陵我 明天順間武功伯徐有貞篝燈
深入嘗見隔凡二字不可入因返口縹緲峰乃西
洞庭絕頂為七十二峰之首上有石如鷲鳥獨峙
名鷹頭石蕭梁大同四年建水月寺於峰之西北
寺東入小青塢有泉瑩徹甘涼冬夏不涸宋李彌
大名之曰無礙泉其地產茶入貢謂之水月茶口
其側為毛公壇漢劉根得道處也根既成仙身生
綠毛人或見之故名道書七十二福地此壇第四
十九或曰即威靈丈人壇之傍有石池深廣袤丈

大旱不涸是爲毛公井口金鐸山在縹緲峰之東相傳吳王藏金鐸於此晉王嘉拾遺記云洞庭山下金堂數百間仙女居之金石絲竹之音徹於山頂上有娑婆樹枝葉常青人欲折之則有巨蛇毒螽圍繞口鴻鴈山自縹緲峰迤東而北狀如鴻鴈連翩其西有練瀆吳王開以練兵王充論衡曰闔閭嘗試士於五湖之側加於有血流至地卽此瀆也山之東有聖姑廟吳郡志云晉瑯琊王彪二女姊號聖姑妹號素姑著木屐履水而行折蘆而坐邑人神之沒後立祠唐刺史于燕公發其棺容色如故觸于化爲微塵練瀆之西一里有雉塘聖姑嘗省其兄於此爲雉所驚因而禁絕自是西洞庭遂無雉古稱洞庭無三斑蛇虎雉也侯景之亂始有蛇口消夏灣在縹緲峰之南吳王闔廬避暑於此灣深九里三面皆山環繞獨南如門闕灣中多魚產菱芡人家百餘皆衣食之口明月灣在消夏灣之東吳王翫月於此或曰以洞庭環抱如月故名又有可盤灣與消夏明月共爲三灣相連十許里口角里在洞庭山西南漢角里先生嘗居之有角里村周樹洞曆云姓周名術泰伯之後一號

霸上先生明布衣陸組家于舟頭○夫椒山在洞庭山西北左傳哀元年吳伐越敗之夫椒卽此○龜頭山一名龜山以形得名洞庭之支嶺也山多奇石堅而且潤可碑可礎可柱可礎山下有如鳥立者曰雞距石有若蹒跚見水面者曰龜殼有小於此者曰蟹殼○橘社在東洞庭豐圻南有大石若屏名石壁卽靈姻傳湘濱柳毅所扣橘樹之處稽神錄載唐大曆初處士李籛秋夕於震澤捨舟野步望見煙火意爲漁家漸近乃朱門俄有青衣出曰君非李處士乎願得少進籛隨步而入瑣窓洞戶中有女郎揖生曰某生於龍宮好楚詞君能受我一篇傳於世人乎乃以水晶簪扣盤而誦芷秀葍華之詞俄聞隔水鐘聲女郎曰此非清虛之士不得遊因贈生素綃送之出門朝日已升有識者視其綃曰此龍領小髻所緝也○長洲苑圖經云在縣西南七十里孟康曰以江水洲爲苑韋昭云長洲在吳縣東枚乘說吳王濞云漢修治上林雜以離宮佳麗玩好圈守禽獸不如長洲之死也唐曰居易詩春入長洲草又生鷓鴣飛起少人行草深不辨娃宮處夜夜蘇臺空月明温庭筠詩錦

雉雙飛梅結子平春遠綠窓中起吳江澹水盡連
空三尺屏風隔千里小苑有門紅扇開天絲舞蝶
共徘徊綺戶雕檻長如此韶光歲歲如歸來○吳
宮在長洲苑東南五十里相傳吳王別宮又有南
宮在吳縣界亦吳王別宮宮中有香水溪俗云西
施浴處一云吳宮人洗粧於此故又呼為脂粉塘
古樂府安得香水泉濯郎衣上塵○吳地記云長
吳二縣虹橋三百有餘其最著為楓橋去閶門西
七里豹隱紀談云舊作封橋後因張繼詩相承作
楓今天平寺藏經多唐人書背有封橋常住字張

繼楓橋詩云月落烏啼霜滿天江村漁火對愁眠
姑蘇城外寒山寺夜半鐘聲過客船○炭渚橋吳
時海渚之通源也後沙漲為陸基址存○定跨橋
相傳闔閭于行苑內置為遊賞之處○憇橋在城
西南隅吳地記云闔廬十年有東夷侵逼吳境吳
王點軍親征出戰十里憇歇於此故曰憇橋及進
軍至食時令臨頓宴食今有地尚名臨頓吳丞相
步騭墳在臨頓橋西南石碑見存陸魯望家亦在
焉○鶴舞橋即閶門外之橋也宋鄭虎臣宅于橋
東居第號半州四時飲饌各有品目著集珍日用

一卷并元夕潤燈實錄一卷○夏侯橋唐夏侯司
 空建或云橋旁有夏侯廟因名宋潘夢旂記○鳥
 鵲橋在長洲縣東白樂天詩云烏鵲橋紅帶夕陽
 ○花橋白居易詩揚州署裏夢蘇州夢到花橋水
 閣頭即此○可過橋在長洲舊縣治前初橋低不
 通舟楫諺云長洲縣前難過淳祐中改作取韓文
 公詩語也○石巖橋在府治西唐刺史白居易建
 名白頭橋有石刻三字宋天聖初郡守孫冕修之
 人呼為孫老橋元總管道童重建改名石巖其自
 號云梅摯詩白頭橋柰白頭何舊德如存故老歌

不特輿梁起遺愛大都才美服人多○明澤橋在
 西河宋皇祐五年建景定五年重修劉震孫題名
 立石其上○來遠橋在胥門內舊姑蘇驛址宋紹
 興間王喚奏建專待國信使取魯論語名之又名
 驛橋○鄭使橋宋鄭戩拜奉國軍節度使卒官歸
 柩于吳所居有橋名以識之○泗馬橋在橫金鄉
 宋有楊亮者家於橋下常見白鼠入穴掘得書一
 卷有車唐張氏世稱為神之語遂往訪適張他出
 因擲一索於其家家人見蛇入臥內奔告張張知
 為亮也追而飲之蛇復為索提刑吳潛飲於舟次

亮持籃步水上入潛舟假白金酒罌潛見其裸而
置小意不能藏試與之亮卽納籃中而去翌旦於
所居橋上碎而分諸貧者潛追逮至官亮因注水
於盆剪紙爲魚游躍水中又剪一魚飛於庭下攫
魚而上衆皆仰視遂失所在○樂橋在臥龍街元
皇慶元年有張三郎者善笛八月十五夜倚橋作
伊州曲忽有老人來曰爾笛固清未能脫俗爲爾
正之乃指教其孔換易數字曲益清雋老人因取
笛自吹其詞曰月旣明西軒琴復清寸心斗酒爭
芳夜千秋萬歲同此情歌宛轉宛轉聲已哀願爲
星與漢光景共徘徊悲且傷參差淚成行低紅掩
翠方無色金徽玉軫爲誰鏘歌宛轉宛轉結復悲
願爲烟與霧氤氳共容姿張復請授其指調老人
笑曰子凡心豈能教耶去數步不見○伽盤記云
開元禪寺在盤門內吳孫權母吳夫人捨宅建永
禪師開山名通玄寺唐開元改今名寺內有二石
佛相傳晉建興二年滬瀆海口漁者見神光照水
徹天旦視之乃二石像浮水上或曰水神以牲禮
迎之像乃背身泛流而土吳人朱應等率衆香花
詣繞乃于海壩迎入此寺像放光明七晝夜不絕

梁簡文帝爲制石佛碑銘唐東宮長史陸東之書
江淹吳中禮石佛詩幻生太浮詭長思多沈疑敬
承積劫下金光燦海涓火宅飲焚炭藥中含惠滋
常願樂此道誦經空山坻禪心莫更雜寂行好無
私軒騎久已决親愛不留遲憂傷漫漫情靈意終
不緇誓尋青蓮界永入梵庭期唐韋應物遊開元
寺夏衣始經體遊步愛僧居果園新雨後香臺照
日初綠陰生晝寂孤花表春餘符竹方爲累形跡
一來跡○承天能仁寺在府治北吳地記云梁衛
尉卿陸僧瓚見其居宅有瑞雲重重覆之遂捨爲

寺初名重玄宋改今額寺僧有重殊者初爲士人
與鄉薦妻以藥毒之遂削髮爲僧時時食蜜以解
藥毒蘇軾與之善號爲蜜殊工詩有寶月集行于
世又有飯頭號宗本每飯熟必禮拜然後供僧一
日忽悟恣譚皆經中語仁宗召見賜金爛衣號圓
照禪師唐李嘉祐登重玄閣詩高閣朱欄不厭遊
蒹葭白水繞長洲孤雲獨鳥川光暮萬井千山海
氣秋清楚林中人轉靜夕陽城下角偏愁誰堪遠
作秦吳別離恨歸心雙淚流○東禪寺在府治東
南孫吳赤烏間陳丞相宅因池生瑞蓮遂捨爲寺

名鎮國院唐改今名宋僧遇賢居之遇賢長洲人性嗜酒人呼為林酒仙醉則作詩時有警句尤能前知禍福書符療病立愈郡中有虎為患遇賢見之騎以出城其患遂息○北禪講寺在齊門內晉戴顓宅也唐司勳陸郎中居此後以為寺吳郡志唐有乾元寺不知所在然顓况以乾元寺為戴達宅而皮陸集又以北禪寺為戴顓宅據此則今北禪即古乾元也宋有可觀法師郡帥魏杞請主北禪適當九日上堂曰胸中一寸灰已冷頭上千莖雪未消老步只宜平地去不知何事又登高魏公

擊節歎賞○宴聖寺梁天監三年司徒長史吳郡張融舍宅置右衛謝陸彥遠書額○禪房寺宋建武元年蘇州刺史張岱舍宅置吳郡陸曾書額○流水寺吳郡陸襄舍宅置三殿三樓高僧清閒建吳縣令田伯葉書額○廣慈寺宋建武元年高士將軍置○慈悲寺齊永明二年吳人薛曇舍宅置宋周曇卒遺言遷其靈柩于殿下○陸卿寺梁梁莊捨建○龍興寺唐則天皇后置御書額開元五年再興此寺刺史張廷珪模勒此書于碑○般若臺晉穆侯何曾置內有水池石橋唐景龍二年銅

像現光數日不歇勅改神景寺東北有般若橋因寺而名○白蓮寺在甫里松江之滄陸龜蒙祠在寺中像設皆唐物也宋咸淳中有盛氏子醉仆其像于水滿腹皆所藏平生詩文知府倪普聞之更為塑像而腹中之稿散佚多矣先生墓亦在寺傍○雍熙寺宋真宗重建其傍有朱樂圃長文墓長文字伯原朱南宮芟為書墓志真蹟尚存○半塘寺由閶門而遊虎丘其途相半故名寺內有鸚鵡塔國初金華宋濂再生血書華嚴經○獅子林在城東北隅元有維則和尚者得法於本中峰本時住天目山之獅子巖至正二年則之弟子為師結菴於此因以獅子為名師多論建有楞嚴會解語錄別錄剩語各若干卷其為詩云半簷落日曬寒衣一鉢香羹好蕨肥春雨春煙二三子水西原上種松歸又鴉鵲爭巢似憤兵怒鳴死鬪亂縱橫可憐踏折娑羅樹滿地落花無路行又道人肩水灌畦蔬托鉢船歸粟有餘飽飯禪和無一事繞池分食餒遊魚又臥雲室冷睡魔醒殘漏聲聲促五更一夢又如過一世東方日出是來生○幻住菴在閶門外鴈蕩村元大德間有僧曰明本者結菴

於此著廣錄三十卷今入大藏中嘗有除夜偈云
茅屋三間冷似冰灰頭土面十餘僧掃除自己閒
枝葉不打諸方爛葛籐就手揭開新歲曆和光吹
滅舊年燈頂門別具摩醯眼越死超生似不能○
吳地記云崇善觀玉芝觀並梁天監二年置○升
羽館帶城橋二百步舊爲羽流升仙之所○烏鵲
館在郡南高橋昔人置觀于是處○上真宮唐至
德二年置神景宮乾符二年置○玄妙觀在府治
東北唐曰開元宮宋爲天慶觀有何中立者本淮
陽書生一日荷蓑來寓觀中佯狂妄譚久而皆驗

臥草中以其垢穢晨起必溲於吳江吳江至郡四
十五里而往返不數刻觀中諸黃冠以殿宇摧毀
白之何何因求疏軸云來日自有施者至期果有
朝使來徵何以疏軸授使曰我不能入覲以此累
使者上聞益奇之遂出內帑緡錢數萬以答其意
孝宗忽夢有蓑而跣哭而來弔曰臣蘇人也居月
餘成恭后及莊文相繼上仙帝憶夢而嗟歎不已
璫乃述何踪跡大類夢中所見帝益大驚使人徵
之不至慶元三年五月二十三日逝化○輿地碑
目云蘇州尚經李宗諤修定○續志朱長文編○

新志范成大編按卽吳郡志也見言行錄宋板尚
有存者予于常熟趙玄度處見之○城隍廟唐碑
吳郡志云其初春申君也宋時尚存○春申君廟
記歐陽修集古錄編第三百二十八云唐居正撰
史惟則八分書并篆額天寶十載云○長洲縣画
龍記唐李紳撰○包山神景觀林屋洞碑唐開成
三年建○報恩寺惠敏律師碑銘台州刺史陳諫
撰蘇州刺史元錫書○天台大德元浩和尚靈塔
頌太原少尹崔恭撰○周先生在山碑在洞庭山
唐令狐楚撰○楞伽寺石記在橫山下山巔有塔
隋時所建石記存馬旁有巨井欄欄側有隋人記
刻○龍興寺碑宋紹興二年瓦礫中得房瑄所作
寺碑○顏真卿虎丘石刻唐詩紀事二十四卷內
吳門有清遠道士周恭子遊虎丘山其辭云自商
周歷近代抑二千年來矣鬼神耶隱士耶莫能測
也辭藻健俊魯公愛之刻于巖際○江總碑紀事
三十卷內苗發送司空曙之蘇州詩云若到紅霞
寺應看江總碑○重玄寺法華院石壁經碑文太
和三年春郡守白居易記○南禪院千佛堂轉輪
經石記開成二年二月一日白樂天撰○重玄寺

藥園唐末僧元達年踰八十好種名藥凡取種者多致自天台四明包山勾曲叢萃紛糅各可指名皮日休嘗訪之為賦詩○石幢在郡城北數里唐徐浩書郡守陳師錫徙置府第鄉人夜過河上者多見鬼物乃相與請于州復置舊處其怪遂絕○古松在天平山獅子巖下自地崛起甚怪正中一幹聳拔如幢延袤二畝號眠松張卽之書卧雲二字扁之云范文正讀書處也○塚記云吳孫堅墓在閶闔門宋南渡時被發楊友夔作詩云閶闔城邊荒古丘昔誰葬者孫豫州久無使客為下馬時

有牧童來放牛○戰國馮煖墓在吳縣東北二里卽煖所居死葬其側唐碣尚存○陸烈字伯元漢初為吳令豫章都尉既卒吳人思之迎葬于胥屏亭子孫遂為吳人郡中陸姓皆其出也○三老顧綜墓在婁門外塘北與朱梁墳相直顧况撰廟碑有云刊石婁門德輝不滅是也○後漢黃香墓在梅里涇宋乾道初梅里蘇忠翊直下葬得古塚乃黃香墓碑刻隸書首兩句八字中二字不可識延陵慈父葬子博羸孟光貞婦寔天於吳碑陰乃會稽東部都尉張紘誄又有薛綜脩祠日月題刻可

辯者八字子瓊孫琬位登三事云○晉瞿劭先

生墓在直塘市市傍有廣安寺浚渠得古冢塼云

瞿劭先生字鵠廣川人隱居不仕葬于東陵武安

寺重岡之源武安蓋廣安舊額也○梁太常卿陸

倕墓在吳縣綏山鄉墓石從子襄為序湘東王繹

為銘普通六年立○陳黃門侍郎顧野王墓在楞

伽山下吳地記云在橫山別隅平地不起墳紹興

間碑石尚存高啓詩云南朝舊墓碑倒近樵蘇道

應與讀書堆離離總秋草○元至元間郡人朱澤

民祖母病卜地陽抱山夢偉丈夫告云勿奪吾宅

既而穿地得石刻曰鬱林太守陸績之墓內又有

刻云此石爛人來換驗之石果斷矣遂掩而卜于

其傍○給事黃門江纂墓在天平山下地名上沙

宋孫起卿於其地獲墓磚刻文畧云纂養父諶本

父廼云○唐河南法曹參軍張從師墓在虎丘

張說撰誌稱從師辯博閱達好古逸羣秀才高第

歷官五政弟從申善書有時名子惟儉惟靜皆精

左氏穀梁春秋○山南西道節度使歸融墓在城

西二十餘里有大家巋然土人號歸王墓按史融

官終少傅無王封稱歸王者訛也宋嘉熙間民墾

土得石如礎其中隆起八分書云唐故陳留言夫
人墓誌四維下殺刻瑞芝或與融同穴異砭耳○
陸宣公贄墓在齊門外六里虛舟客話云在官河
之西地名陸墓水名陸塘淳祐中嘗於墓傍得遺
刻與所傳合○朱氏墓在穹窿山傍墓碑云先居
下邳自平始三年避地至金昌壬戌凡八百四十
二年籍于吳故有邳村之名叙過江之祖子孫官
爵字多湮泐俚俗妄云漢朱買臣墓非也○魯國
夫人墓宋嘉泰中齊門外採蓮壑壑戶起工於古
冢側得方石題云唐周軍魯國夫人墓又云長慶

二年四月十四日葬於陸墓里通賢鄉之原○天

章閣待制沈起墓在長山鄉三顧原起字興宗元

祐中以刑部郎中待制知杭州三年卒于蘇沈括

銘○施昌言妻萬壽縣君徐氏墓在三讓鄉陸公

原歐陽脩銘○滕章敏公元發墓在陽山栗鳴蘇

軾銘○蘄國韓忠武王世忠墓在靈巖山西紹興

二十一年王薨賻祭極優渥敕使徐伸護葬縣令

執役御題神道云中興佐命定國元勳之碑高十

餘丈為樓三成覆之今碑尚存而額在百步之外

鄉人以為龍陣過揭去云○魏文靖了翁墓在高

景山金盆塢嘉熙元年葬直寶章閣史繩祖撰神道碑○奉議郎鄭時發墓兵部尚書鄭起潛墓並在陽山西理宗書錦峰二字以表其地起潛刻石撰記有云其石有文厥土五色是也○元禮部尚書于文傳墓在閭門西雁蕩村史官歐陽玄撰封二代碑黃潛撰碑陰記○儒士邵光祖耿燁姚辨三墓俱在鄧尉山光祖字弘道饒州人燁字叔昭辨字叔雅郡人皆篤學無嗣先後死無所歸郡士徐達左收葬之光祖銘王行作燁銘周南老作○石林詩話云姑蘇州學之南積水瀾數頃傍有小

山高下曲折相望蓋錢氏時廣陵王所作旣積土山因以其地瀦水今瑞光寺卽其宅而此其別圃也慶曆間蘇子美謫廢以四十千得之爲居旁水作亭曰滄浪歐陽文忠公詩所謂清風明月本無價可惜祇賣四萬錢者也子美死後屢易主今爲章僕射子厚家所有○石林又云余居吳下一日出閭門至小寺中壁間有題詩一絕云黃葉西陂水漫流蘧蔭風急滯扁舟夕陽暝色來千里人語鷄聲共一丘意極喜初不書名氏問寺僧云吳縣寇王簿所作今滿去矣歸而問之士大夫云寇名

國寶蓋與余同年然皆莫知其能詩也余數爲好事者舉此詩始有言國寶徐州人久從陳無已學乃知文字淵源有所自來亦不難辨恨不得多見之也○文獻通考造化權輿六卷唐豐王府法曹趙自勳撰天寶七年表上陳振孫曰陸佃農師著禪雅頗采用之其孫務觀兩嘗爲跋余求之久不獲已亥吳門天慶觀道藏中借錄○通攷又載雲笈七籤張君房慕陳氏亦于天慶觀道藏內抄錄得一百二十卷

崑山縣

在府東七十里

今之吳淞江乃古婁江秦置縣以婁爲名圖經云婁城在今縣東三百步吳子壽夢所築舊志謂之東城今橋巷猶以東城爲名耕者於東寺後多得古城磚及銅箭鏃或云漢膠縣也漢志有南武城闔廬所築以望越寰宇記云梁天監六年分置信義縣于此今縣西二十里有信義村疑卽古縣治大同初又分置崑山縣以縣東有崑山故名輿地紀勝云崑山在縣西北或曰在華亭蓋始本崑山地後割入華亭耳吳地記云陸氏之先塋此山晉

陸機兄弟生焉故時人比之崑山出玉也○西鹿城在崑山下昔有人於此山得斷碑略云府君姓十名珍字文超西河人唐寶曆元年終塋於崑山西鹿城鄉故知在其處○巴城在縣西北十八里其地有巴王墓巴城湖又有雉城今為雉城村古經所載又有金城度城顏縣城尾浦城並屬境內○志云縣西北馬鞍山廣袤三里高七十丈或以為卽崑山也有桃源洞鳳凰石翠微峰連雲寨諸勝又有征北將軍陸禕墓碑其地連接湖海孤峰特秀梁天監十年吳興沙門惠嚮謂是山可建佛寺

寺坐於山脇石室間一日冥寢有山神前現曰願助千工是夕雲驅電掣風撓雷動駢闐鞭朴之聲驚悸數里詰旦靈基倏成橫袤十有七丈高聳二丈混然削成非人力所致事聞武帝為造寺錫名惠聚封山神為大聖山王勅張僧繇繪龍於四柱後龍數出湖內僧繇又畫鎖以銓之唐會昌中寺廢柱留郡中至大中寺復興柱亦隨還宋淳熙寺火柱燬又得二柱於雷火中各有天書如大篆一為勣溪火三字一蜿蜒蟠結若符呪語人莫能曉五代唐紹明律師居半山彌勒閣一夕夢神人曰

簷前梧桐下有石天王像與銅鐘詰旦掘地果獲
 二物制度蒼古宋元豐四年夏駕里民羅滿獲一
 鯉長可二尺俄化為石大士像因供於家時慧聚
 寺僧守齊夜艤舟於此夢白衣女子求附舟守齊
 拒之女曰假宿篋中何傷守齊開篋納焉驚覺詰
 旦至羅家見石像知其魚化念與夢合因乞以歸
 唐張祐慧聚寺詩寶殿依山險凌虛勢欲吞畫簷
 齊木末香砌壓雲根遠景牕中岫孤烟竹裡村凭
 高聊一望歸思隔吳門孟郊前題昨日到上方片
 霞封石床錫杖莓苔青袈裟松栢香晴磬無短韻

晝燈含永光有時乞鶴歸還訪逍遙場僧冲邈山
 居四首閒來石上臥長松百衲袈裟破又縫今日
 不愁明日飯生涯只在鉢盂中又臨溪草草結茅
 堂靜坐安然一炷香不是有心除妄想祇緣無事
 可思量又幼入空門絕是非老來學道轉精微鉢
 中貧富千家飯身上寒暄一衲衣又一池荷葉衣
 無盡數樹松花食有餘却被世人知住處更移茅
 舍向深居口元顧仲瑛字阿瑛別名德輝有玉山
 草堂其名本此阿瑛家在茜溪園林之勝甲于宇
 內名流韻士多集焉袁之得五十餘家詩七百餘

首仲瑛別著有玉山樂府行于世○秦柱山在縣南三十里山南際海上有火樓基吳錄云一名秦望山始皇嘗登之故名唐薛據詩南登秦望山目極大海空朝陽半蕩浴晃朗天水紅溪壑爭噴薄江湖遞交通而多漁商客不悟歲月窮振緝迎蚤潮弭棹候遠風予本萍泛者乘流任西東茫茫天際帆栖泊何時同將尋會稽迹從此訪任公○千墩在縣東南迤北三十里地名木瓜有墩九百九十九與此合為千數因名千墩浦○緯墩在縣西十八里相傳唐開元時黃幡緯塋此故名明高啓詩淳于曾解救齊城優孟還能念楚卿嗟爾只教天子笑不言憂在祿兒兵○天女墩在縣東南十八里洪莊村墩之上下皆茅草惟中間一路若經人行雖植草不生相傳有帝女莖馬未詳何代其傍有金龍舟每風雨夕即聞金鼓聲村民夜過其處見所謂龍舟者攫取之僅得一人像可尺許及歸即大病又嘗有人欲發此為毒蜂飛火所逐而止○東山在縣城東宋范良遂讀書于此名曰墨莊著有墨莊漫錄又十五里為媧婦山上有媧婦廟今移大泗村而山則夷矣○吳淞江在縣南

九里禹貢三江之一東北下二百餘里曰婁江亦曰下江又名新江宋置新江驛于此葉時亨詩短棹夷猶落照間不堪疑望發愁端白鷗盟在容尋理急辨烟簑與釣竿○澱湖在縣南八十里北岸屬崑山南岸屬華亭因詳彼處宋衛涇泛舟澱湖詩疎星殘月尚朦朧閒入烟波一棹風始覺舟移楊柳岸直疑身到水晶宮烏鴉天際雲成點白鷺灘頭玉作鼓欸乃一聲回首處青山還在有無中○景德寺在縣西南晉咸和二年置原名寶馬寺以宋景德二年重脩寺內有王司徒祠祀晉王珉

也以寺爲其所捨宅云○方秦寺唐大中三年置晉天福二年重修○永懷寺宋時高麗國進陰陽栢兩株高宗以賜王絢絢種于寺中每歲左花則右實右花則左實○孟尚書祠在縣治儀門外尚書佚其姓名亦不知何時人相傳縣北卽其故宅也○張公廟在縣東南三里祀張方平以知崑山有惠政民德而祠之安道有崑山初秋觀稼回縣署與同寮及示姑蘇幕府詩○唐太宗第十子宋紀王慎其玄孫也爲崑山令有文名○神龍間縣令范齊融越州人與于休烈賀知章賀朝包融爲

文詞之友名重一時○大曆九年王綱以大理司直出爲崑山令始作學舍置博士弟子員詳見梁肅修學記○王嵩幽州人大理評事適之父也元和中爲崑山丞見韓愈所撰墓志○劉綺莊毘陵人爲崑山尉研窮今古墓記浩博有類書百餘卷名崑山編○權立德輿之從兄也敏思勤學澹于宦情任崑山簿文公作詩送之○宋沈遼字獻達錢塘人好讀左氏班固書爲文雄奇峭麗與曾鞏蘇軾黃庭堅唱酬以審官西院主簿論事忤王安石石出知崑山後徙池州竟不復起○張漢之爲崑令政務寬厚緩于索租上司詰問漢之言其家自來如此故不欲與人索也蓋其父兩爲憲漕五領郡符而家無長物云○宋南渡紹興間潘友文字文叔爲大令葛洪字容父爲縣尉俱東陽人與朱熹呂祖謙友善○唐高士傳陶峴者淵明之後也開元中居崑山富有田業擇不欺者悉付以家事峴徧遊江湖往往數年不歸見其子孫成人初不辯其名字峴饒經濟自謂疎脫不謀宦達生知八音撰樂錄以定其得失自製三舟備極堅巧一以自載一置賓客一貯餘饌客有孟彥深孟雲卿焦

遂亦各置僕妾與之共載峴有女樂一部奏清商
曲逢佳山水必窮其勝經過郡邑聞名招延率不
能致每遇興發亦不召而徑赴吳越之人號爲水
仙○劉龍洲祠祀宋詩人劉過過字改之廬陵人
客死昆山塋焉凌萬頃弔以詩有百歲光陰隨酒
盡一生氣槩祇詩存之句○龔詡字大章崑山人
父咎洪武初爲給事中謫戍死詡少依母族日姓
王氏旣長隱迹田里肆力經書晝夜不輟尚書周
忱屢至其家資訪時政兩薦爲松江太倉教授皆
不就有田三十畝力耕自給晚歲獨與一老婢居
破廬中種荳植麻詠歌自適歿年八十餘門人私
謚曰安節先生

常熟縣

在府北
八十里

沈約宋志云晉武帝太康四年分吳縣之虞鄉立
海虞縣輿地廣記云梁大同六年分置南沙常熟
二縣是時累歲豐稔謂其土沃故以名縣隋平陳
徙常熟於南沙而省海虞入焉隋志常熟縣下注
云舊曰南沙卽此梁置信義郡隋平陳郡廢并所
領海陽前京信義海虞興國南沙六縣俱入常熟
又廢晉陵郡而置常州於治內以縣隸焉州徙昆

陵乃割常熟入蘇州唐武德七年移理海虞城卽今所也○常熟縣志宋孫應時編公字季和餘姚人從學于陸子靜在縣公餘因撰志攷若干卷○常熟縣令題名碑紹興間曾慎立于觀風樓下王伯廣撰記○破山龍祠禱雨記唐咸通年皮日休爲縣令汝南周思輯頌○常熟塘碑劉允文爲縣令李曠立山塘俱詳見後○顏顥瑯琊人魯公之子也爲常熟尉第頓爲吳縣簿子孫遂家于吳按郡志眞卿在吳爲書師者十餘年○張旭釋褐調常熟尉上任之後有老人遞狀判訖不數日復至

怒而責之曰敢以閒事屢擾公門老父曰某實非論事但覩少公筆跡奇妙貴爲篋笥之珍耳旭字伯英世稱張長史郡志云旭尉常熟時因老人求判得觀其父所書益盡其法所載不同如此○宋錢振以登仕郎調常熟主簿范仲淹送其歸省詩云姑蘇臺下水如藍天賜仙卿奉旨甘梅淡柳黃春尚淺王孫歸思滿江南振郡人亦吳越之裔也天聖三年任○志云海虞城周二百四十丈初編竹木爲柵甚堅緻元改築土城周一萬四千八百四十丈張士誠重甃以磚周九里凡三十步○石

城在縣北石城里吳地志云越獻西施於吳王王
擇虞山北麓以石甃城爲遊樂之所故吳越春秋
謂夫差與樂石城也○扈城在石城之東世傳吳
王建離宮扈蹕于此今有扈城村○九里城去縣
九里世傳吳王牧馬其中建城以欄馬俗呼欄馬
城今有洗馬池○莫城在縣南十二里相傳莫邪
鑄劍之處一謂劍城一謂莫邪城今有莫邪廟又
有莫門塘寰宇記云漢時有莫寵築此城以捍海
賊故名○朗城在縣東南鶉城在縣東北尚墅城
金鳳城在城西北俱相去三四十里○名山記云

虞山在縣西北高一百六十丈周四十六里六十
六步吳地記云孫權置虞農都尉於此按吳越春
秋云闔閭長子終纍娶齊女病而思鄉曰必塋我
虞山之巔以望齊塋畢化爲白龍冲天而去越絕
書云虞山商臣巫咸所居則吳越時已有虞山矣
或云虞仲塋此得名其山東西凡十八里有數十
石室又有石壇周迴六十丈舊志一名海虞一名
海隅又名烏目山○郡志云虞山雖無峰巒而蜿
蜒起伏略如臥龍上有土垤硯礪或疑爲古塚而
不可考南有維摩菴太公石室舊傳太公避紂居

東海之濱縣濱海或為近之傍有石洞天將雨則雲氣出其中又西北為拂水巖崖石陡峻瀑水奔注如虹凌風飛濺最為奇勝循山而西有致道觀梁天監二年漢嗣天師張通裕居此感異夢建招真治故梁昭明太子作招真治碑記云高崑鬱起帶青雲而作峰瀑水懸流雜天河而俱漚也天師復建寥陽殿虛皇臺手植七星檜尚存相傳昇仙日瘞劍於山之西麓簡文帝改為乾元宮宮內有丹井 國初宋濂序云張通裕鑿井一口于招真治以為藏丹之所宋淳熙中道士李正則浚井得

藏丹石礧落之化為雙紅鶴飛入尚湖至今湖內丹光煜煜黃冠申元道師事徐神翁得修煉術將出遊請於師師曰逢虞則止無雪則開乃渡江築菴於虞山插竹成林因名竹林恒患無水一日大雪獨於菴前不積遂浚而得泉今乾元宮側有雪井是也 嘉興項家藏沈石田水墨三檜卷後有大字跋云虞山至道觀有所謂七星檜者相傳為梁時物今僅存其三餘則後人補植而三株中又有雷震風摩者尤為危異真奇觀也暇中與子壻史永齡往觀焉永齡因請圖之歸為而翁西村先

生之玩蓋以西村未嘗見耳并寫歸途所得詩於後西村寧不有以教我乎其詩云昭明臺下芒鞋緊虞仲祠前石路迴老去登臨誇健在舊游山水喜重來雨乾草愛相將發春淺梅嫌瑟縮開傳取梁朝槍神去袖中疑道有風雷時成化甲辰人日沈周○雲和塘本名元和塘唐郡守李素所治成于元和四年也後訛爲雲和今但稱常熟塘南連運河西接尚湖湖面虞山映帶蒼翠極目沈啓南詩日午放船湖上頭虞山隨船走不休高雲仰見出翠壁飛影下接滄波流○破山在虞山北六里

宋龔明之云舊有四高僧講經山中一老翁日來聽講久之問所從來答曰吾乃龍也僧因誦揭諦咒龍現本形與神鬪不勝破其山而去故以名之南齊始興五年邑人倪德光捨宅建大慈寺於此梁大同三年改興福寺慶元志引注山海經曰虞山之北岡壠相接此卽烏目山也旁有硃沙洞放生池又東北有空心潭及舜井吳郡志云齊無始興年號所謂寺建於始興五年者唐人再修功德記之訛也睽車志云常熟破山寺僧堂李唐新建柱有雷神書凡三內有一柱題云煦溪可作火田

凡六字上一字作從貝從力字書所無皆作隸體
倒書入木三分兩伽藍亦塑自李唐今俱不存常
建破山寺詩清晨入古寺初日照高林曲徑通幽
處禪房花木深山光悅鳥性潭影空人心萬籟此
俱寂惟聞鐘磬音僧皎然詩秋風落葉滿空山古
殿殘燈石壁間昔日經行人去盡寒雲夜夜自飛
還○頂山在破山北十二里上有高女峰相傳齊
景公之女葬此白龍池在焉西北有水簾洞兩水
合流從石厓下注漫流若簾○福山在頂山西北
十五里高九十五丈周五里本名覆釜唐天寶六
載改爲金鳳後梁乾化三年又改今名○河陽山
一名鳳皇山在福山左周七里梁大同二年侍御
史陸孝本捨宅爲寺初名大福尋改永慶相傳有
示寂僧肉身泛海而來狀貌奇古僧徒迎置於寺
靈應多驗山頂有石井泉清而甘大旱不竭名曰
聖井庭有八檜一夕雷震西南一株其斷幹附於
他株而生是稱三絕○志云言偃宅在縣西今稱
言公巷宅內有井名墨井濶三尺深十丈傍有盥
盟百餘步有浣衣石可方四丈盟卽壇也古字通
用耆老相傳浣衣石至蕭梁時始失之范成大云

常熟別名琴川本子游絃歌之說也○吳地記云夫差廟在縣西二里折姑蘇臺以造其剩一木仍刻吳王像唐陳羽詩姑蘇臺畔千年木刻作夫差廟裡神幡蓋寂寥塵土滿不知蕭鼓樂何人○東靈寺唐聖曆年置舊名十興寺屬吳縣界神龍年改今額仍移今所○慧日寺本常熟平禪院祥符元年改今額○勝法寺唐乾元年置為離宅寺今額亦祥符改○勝國黃子久字公望自號大痴又號一峰本姓陸世居常熟縣出繼永嘉黃氏僑居西湖之龍井遂為浙江人子久博學強記畫山水宗董巨自成一家○常熟顧氏自閩中移荔枝數本經栽遂活姑蘇沈周折其枝驗之翠葉芄芄遂作新荔編併圖之此二則四史所載

吳江縣

在府南四十里

吳江本名松江又名松陵舊設松陵鎮於此唐時皮日休陸龜蒙有松陵唱和集襲美襄陽人為吳郡從事新秋詩云酒坊吏到常先見鶴俸符來每探支自註鶴料錢出松陵○圖經云本吳縣地梁開平三年析置吳江縣五代史職方考云蘇州吳江縣錢鏐置立有南北兩城沿革表云元元貞年

陞爲州 國朝洪武二年復爲縣○皮日休松江
蚤春詩松陵清淨雪消初見底新安恐未如穩凭
船頭無一事分明數得膾殘魚陸龜蒙和柳下江
餐待好風暫時還得狎漁翁一生無事烟波足惟
有沙邊水勃公○淞江禹貢三江之一卽古笠澤
江也自太湖分派由縣東門外垂虹橋北合龐山
湖轉東入長洲界劉長卿泊吳江詩洞庭初下葉
南客不勝愁明月天涯夜青山江上舟一官成白
首萬里寄滄洲久被浮名繫能無媿海鷗張懷前
題多年禪被玉山岑鬢雪欺人忽滿簪鴛馬雖然

貪短豆野麋終是戀長林鱸魚未得乘歸興鷗鳥
惟應信此心見說新橋好風景會須乘月濯煩襟
○垂虹橋卽東門外之橋也一名長橋宋慶曆八
年縣尉王庭堅建東西百餘丈中門有垂虹亭錢
公輔記治平三年縣令孫覺重修初以木爲之南
渡後判官張顯祖始甃以石開七十二洞陶九成
輟畊錄云吳江長橋七十二間作橋者僧從雅師
立總其役崇敬率衆以給資費居士姚行任勞終
事經始泰定乙丑二月期年而成後九年州守的
斤海牙作鉅閣奉觀音像于上清容居士袁桷記

○宋蘇舜欽長橋中秋對月月晃長江上下同畫
橋橫截冷光中雲頭焰焰開金鏡水面沈沈臥采
虹佛氏解爲銀色界仙家多住玉華宮地雄景勝
言不盡但欲追隨乘曉風舜欽字子美銅山人丞
相易簡之孫杜祁公衍之壻也僑居于吳有答韓
維書曠達高致識者比諸嵇康絕交論張先題垂
虹橋春後銀魚霜下鱸遠人曾到合思吳欲圖江
色不上筆靜覓鳥聲深在蘆落日未昏開市散青
天都盡見山孤橋南水漲虹垂影清夜澄光合太
湖蘇軾前題吳越溪山興未窮強扶衰病過垂虹
浮天太古東南水送客今朝西北風絕境自忘千
里遠勝遊難復五人同舟師不會留連意擬看斜
陽萬頃紅楊蟠詩帆落帆開兩渡頭洞庭木葉攪
離愁青山帶日低平野白浪隨風過別洲月靜沙
寒知鴈宿雲深水暖羨魚遊畫橋隱隱橫天漢人
度空中影倒流米芾詩斷雲一葉洞庭帆玉破鱸
魚霜破柑好作新詩繼桑苧垂虹秋色滿東南姜
夔詩自作新詞韻最嬌小紅低唱我吹簫曲終過
盡松陵路回首烟波十里橋小紅堯章侍兒也堯
章每喜度曲吹洞簫小紅輒歌而和之○仙里橋

在縣城東世傳陳昉由此仙去故名橋下有仙人
洞深黝莫測內通太湖約七十里出林屋洞張達
明詩波間出林屋只此是仙鄉○底定橋在震澤
鎮取震澤底定之義有石刻云宋淳佑二年重建
橫跨荻塘○睡龍灣在縣東南黃家溪宋高宗南
渡時駐蹕於此有泉湧出故名○望仙橋在平望
鎮去縣東四十里登樓四望湖天一色故以平望
爲名唐顏真卿詩登樓試長望望極與天平際海
兼葭色終朝鳧鴈聲近山猶彷彿遠水忽微明更
覽諸公作知高題柱名宋楊萬里詩望中不着一

山遮四顧平田接水涯柳樹行中分港汊竹林多
處聚人家風將春色歸沙草天放晴光入浪花午
睡覺來情緒惡急呼蟹眼淪龍芽○南北驛宋紹
興中建堂宇百餘間專爲國信使停宿之所今平
望驛仍其故址然唐初平望却屬吳興故張祐詩
云一派吳興水西來此驛分路遙經幾月身去是
孤雲雨氣朝忙蟻雷聲夜聚蚊何堪秋草色到此
重離羣○平望之水源自天目山東流至荻塘會
爛溪而出鎮故設有爛溪巡簡司陸龜蒙詩注云
漢嚴助墓在吳江爛溪之旁按今爲嚴墓村少保

周用世居之其曾孫曰叔宗者藻才清尚重于一時○陸詩注又云顧彥先宅在吳江陸士龍爲彥先贈婦詩我在三川陽子居五湖陰是也今爲永定寺寺卽彥先所捨陸鴻漸書額舊屬吳縣景福五年始遷于此按吳地記吳縣東南有百口橋相傳後漢郡人顧訓家有百口五世同居鄉人慕之議于近宅造百口橋以彰其美梁天監三年蘇州刺史顧彥先其裔也今北門外三里地名顧墟乃陳顧野王宅宋知縣石處道有顧公祠碑○曹恭王廟在淞江北岸恭王太宗第十四子調露元年

則天后出爲蘇州刺史卒塋于此○縣之陳思村有吳郡餘杭夫人邵氏墓硯格書奩云至順四年耕夫得塹于古壙中有字曰赤烏五年七月造又一方甃刻云吳郡餘杭邵氏夫人墓○聖壽禪寺在縣治西北故名北寺吳赤烏年建宋天聖改今額○無額講寺在常樂坊西故名西寺梁開平年建○法喜寺在縣東十八里後唐長興元年置晉開運三年重脩○應天禪院在縣西南二十里唐乾符二年置○報恩禪院在縣東北二十五里唐大中元年置○陶南村輟畊錄云吳江華嚴寺梁

衛尉卿陸僧瓚捨莊基嚴法師剎始故名華嚴院
浮圖之巔望之有二矢着其上簞羽宛然可辨相
傳宋南渡初金人粘罕乘快一發而中後賈似道
出督時祝矢自誓亦中焉故有至今塔杪留遺蹟
猶是元戎金僕姑之句但閩長樂郭德基嘗有華
嚴塔穎辯斥言其非未詳孰是○王明清玉照新
志云金人寇江南時先兄待制諱舜陟嘗語宣撫
周望云樞密必欲守平江莫若移兵吳江據太湖
天險吾軍以中軍振其前使諸將以小舟自太湖
旁擊之可必勝望不主其議但令召諸將議之及
諸軍畢集望命待制語方略諸將不從蓋諸將皆
喜亂志在爲賊而已陳思恭兵最少居下時爲總
制官聞此謀躍而前曰待制之言甚善思恭願爲
先鋒自餘不從竟已及虜過吳江思恭不白望自
以兵出太湖橫擊其尾中原係虜之民間兵至皆
爲內應縱火焚舟幾虜四太子思恭雖勝望怒其
不白竟不遷官所沉虜舟凡半年許尚在江中吾
家船適至平望見之○陳眉公書畫史載有顧阿
瑛啓云遁迹異鄉甘與草木同腐今年日昏手倦
老態頓加因陪雪坡舟中數日得入城一見然風

景非前諸公散落獨與學古彥文周旋兩日不勝
慨然倘至平望母惜枉駕辰下暑隆唯冀善加調
攝不具五月三日顧阿瑛手書拜公武先生文契
按此卷內手蹟字如龍眼大結構嚴緊有致平望
疑公所居在焉其前有鶯脰湖傳是張志和釣魚
處○鶯脰湖以形似而名一名鶯鬪湖與汾湖相
通汾湖一名分湖分屬吳江嘉興又東連三泖入
華亭界北受曹龍港而通鶯脰作以萬曆壬寅歲
閏月初旬宿鶯脰湖別吳興吳允兆吳翁晉茅孝
若絕句云日逐烟波混釣徒片帆何事指東吳一

痕春水碧于染此地原名鶯脰湖蓋俗以吳興為
西吳蘇州為東吳也○林肇公權吳興人寶元中
進士熙寧三年以尚書屯田員外郎自請知吳江
始至覽江湖之勝緬懷古人慨然有歸歟之興乃
卽松陵勝處作鱸鄉亭繪三高像其中既落成遂
具舟至亭下拂衣而歸按三高越范蠡晉張翰唐
陸龜蒙也地名雪灘在淞江南○裴煜字如晦嘉
祐六年令吳江歐陽修梅堯臣皆作詩送之○柳
楹字安叟東海人乾道元年宰吳江作松陵漁具
圖待制會幾序之刻石今存縣堂西垣○呂祖憲

東萊人祖謙之弟嘉定五年知吳江重修學宮有記刻石

嘉定縣 在府東一百四十里

宋嘉定十年知蘇州府事趙彥橚奏割崑山縣安亭等五鄉於練祈市置縣以其年號爲名○志云縣學前山在留光寺傍廨內有樓曰當山樓名本諸此又有讀書林宋淳佑九年縣令林應炎建其次年復建水竹亭今俱廢○寶山在縣東南八十里 國初永樂十年詔平江伯陳瑄築此以建烽堠爲海運表識周六百丈高三十餘丈初居民恒

見其地有山影云○東岡在縣東青岡在縣西各去城五里○外岡在縣西十八里有溪環之溪南五里爲沙岡又五里爲淺岡○海在縣東四十五里少北與崇明相望俗呼海泖○嘉定之水源於松江自大姚分支轉入東口亦名吳淞江卽古之東江也其南爲白鶴江乃吳淞之上流西與青龍江合○淞江南有塢城舊傳吳王所築基址見存又縣南門外有嚠城元時得古塚碑碣云唐咸通二年莊府君葬于嚠城鄉卽此地也今名嚠塘○槎浦在縣南三十里有上槎中槎下槎三浦舊傳

張騫乘槎至此其地張姓特多○滄瀆壘晉安帝時吳國內史袁崧築此以備孫恩遇害死之楊瑀詩云袁公孤壘大江邊露白江空月滿天過客不堪重吊古英靈中夜泣荒烟○新豐鄉在縣西南十八里宋咸淳間里人鑿土得壙石刻曰新豐今黃渡口是○練祁塘屬春申鄉又名練川界縣市申東西長七十二里仰承江水清澈如練故名後來江水不通別開渠與海潮接非復故時矣陳觀達詩蕭蕭木落舊江山渺渺西風上水船短棹遠衝秋色裏孤峰高聳夕陽邊黃蘆葉響雙溪雨白

稻花香兩岸田滿目客愁眠不得片帆今夜宿卞川○南翔講寺在縣南二十四里梁天監間里人掘地得石徑丈常有二鶴飛集其上僧曰得齊者因卽其地作精舍每鶴至必有檀施後鶴去不返僧方悵然一夕忽有題詩於石上云白鶴南翔去不歸惟留空跡在名基可憐後代空王子不絕薰修享二時遂名寺曰南翔或云唐文宗開成四年行齊禪師見雙鶴翔集若有所依因駐錫於此增修寺宇一日笑曰吾事畢矣鶴如之何乃翱翔南去元葛天明詩南翔建自梁天監白鶴不歸江自

轉深禪空憶祖師齊昔有老堪今有遠我趁江鷗
訪遠公禪扉閉却湖天晚七歲驅鳧有幾房三百
苾芻無半面殿閣參差高入雲一堂可著千僧飯
古栢槎牙不記年柯如屈鐵包蒼蘚古意偏關倦
客懷歸舟有句無人遣僧普洽和韻白鶴南翔何
日返香雲不斷春風轉屋爲鱗次枕江安江作蛇
行到門遠的的明燈金殿寒沈沈複道長廊晚老
翁矍鑠皎鬚眉愛客將迎笑盈面自言天監拓基
來食指數千猶共飯斷碑壁下試摩挲龜趺剝落
生苔蘚茫茫往事比寒潮蒼烟落日愁難遣○保

安禪寺在沙浦梁天監中恒智禪師遊此聞蘆葦
中有猛獸因趺坐經旬有村叟來饋食見二虎馴
狎左右善信龔延諤乃建菴以居之宋嘉定改爲
寺○保寧教寺在江灣鎮五代晉天福年龍樹法
師駐錫于此亦梁時創始也宋徐冲有鐘樓記薛
松詩云江曲蕭梁寺山僧晝掩扉土花封石甃翠
竹上人衣海近潮聲促廊空木葉飛我來味禪寂
相對兩忘歸○崑福講寺原在江灣國初移建
縣治之西舊靈順吉祥院也僧懷瑾詩峩峩跨蒼
穹登臨豈辭陟冷風天外來陽烏檻前走縱目春

正妍溪桃紅間柳對景感舊懷臨空一搔首恍然
蕩太虛煩襟亦何有○何庄寺在婁塘鎮北今日
永壽寺有何氏唐宋以來家焉延呂蒙正爲塾師
于此何自建寺設其先龕位于內名曰香火院○
宋季湖州人吳惟信字仲孚寓居嘉定之白鶴村
以詩鳴有菊潭集行于世郡人糜先生者一日遇
仲孚叩所作因口誦一絕云白髮傷春又一年閒
將心事卜金錢梨花瘦盡東風軟商略平生到杜
鵑糜不覺下拜曰天才也○白鶴村有叔梁紇廟
相傳已久或孔氏子孫僑居江南所建然祠廟記

嘉定有紀王廟祀漢紀信大梁王廟祀彭越樊將
軍廟祀樊噲陳侯廟祀戶牖侯陳平曹王廟祀陳
思王植秦王廟祀唐秦叔寶杜拾遺廟祀杜工部
甫則又皆不知所本云

太倉州

在府東一
百八十里

相傳春秋時吳王置倉於古婁縣之惠安鄉或云
吳王濞或云孫權宋時置節制司酒庫故有滄江
風月樓在今州治北巷元之酒館也因通海運商
舶貿易者咸萃止焉元貞二年升崑山縣爲州徙
治於此至正十三年立水軍萬戶府十六年張士

誠據吳始城之而州治復還崑山 國初立太倉
衛以朱文爲指揮使司分設千戶所十後省爲五
至弘治十年始割崑山之新安惠安湖州常熟之
雙鳳嘉定之樂知循義等鄉置爲州領崇明一縣
卽治酒庫司城周一十四里五十步高二丈濶三
丈環之以濠陸門七水門三宋張泰登婁城詩高
城一望思茫茫湖轉婁江入海長邊境到今無海
縣古倉何處積吳糧鶴栖淺渚寒蘆靜鴈落平疇
晚稻香野水閒雲吟不盡玉峰西面看斜陽按州
名太倉本此○志云穿山在州東北高一十七丈

周二百五十步中有石洞前後通徹故名臨海記
曰穿山下有洞穴高十餘丈昔有海行者舉帆經
其中攷通紀洪武十二年于州治立鎮海衛實沿
臨海之名衛卽梁天監初隆福寺基○州治鎮洋
山知州李端所築祝允明爲之記州學仰山廣文
梁億所築又與學隔陳門塘而一峰臨水者文筆
也○土山在雙鳳鎮晉瞿劭先生修道處有法輪
寺○中峰講寺在頂山南梁大同二年僧月澄建
名中峰菴後改爲寺宋劉拯詩躡徑登高亭天遠
不敢局疎簾捲危簷百里在舉目江橫縞帶明山

隱螺髻綠啼鳥破長煙飛泉漱寒玉雲回猛虎嘯
清風繞巖谷颼颼入青松古淡琴一曲倚欄更凝
望斜陽上修竹無名氏詩云中峰一徑分盤折上
幽雲夕照全村見秋濤隔嶺聞長松舍古翠衰葉
尚微薰自愛蘇門嘯懷賢事不羣僧仲殊詩聚遠
最高亭登臨喜倍增貪陪青眼客不見白頭僧閉
戶三十載壓雲千萬層龍珠彈落處一點白蓮燈
○志云岡身在州治東曰上岡身曰下岡身曰歸
湖岡身在新安鄉者曰青岡在惠安鄉者曰王家
岡州南有水曰茜涇吳郡志云宣和三年開崑山

茜涇浦自太倉歛口卽此處也有大塘西徹松江
北連常熟者曰橫瀝又有東橫瀝西橫瀝中有小
塘貫之瀝水東西流曰岡門有錢岡門張岡門殷
岡門谿徑頗繁又有七鴉浦橫亘百餘里西接崑
承湖滙常熟崑山諸水入海○崑山志云烏夜村
晉穆帝何后父淮居此產后之夕有羣烏夜驚於
村自後凡遇烏鳴徹夜必有赦至明高啓詩荒村
烏夜栖忽繞月明啼生得東家女身爲萬乘妻至
今種高樹不遣烏飛去居人凡幾家愛聽啼啞啞
啼啞啞多驚恠婦關門向烏拜按舊屬崑山縣今

割入州○元殷奎故宅在武陵橋下扁其樓居曰春水船奎詩云江南何處憶當先先憶吾家春水船有酒有花重慶日無風無雨太平年橋爲宋僧文惠建○妮古錄云顧信字善夫居太倉善筆札從趙文敏公遊每得文敏書卽鑱諸石寘一亭中扁曰墨妙文敏以其好學樂爲之書嘗爲杭州軍器局提舉○明朱珪字伯盛初爲崑山人性孤潔師濮陽吳睿大小篆尤喜摹刻凡吳下碑板多出珪手也又喜爲刺印章嘗取宋人王順伯弁元趙孟頫吳子行二家印譜吳睿所刻印文附自製私印纂例爲書名曰印文集考惜不傳所存有名蹟錄○太倉州志陸容撰容字文量成化間進士爲兵部職方司郎中時賈胡進獅子至奏遣大臣往迎容抗言夷人貢異物當卻之耳迎之何爲議遂寢弘治初指揮王欽梁宏以貢緣中貴陞都督容力爭之卒收回成命乃出爲浙江叅政不久罷歸杜門著述有式齋稿封事錄菽園雜記水利集共若干卷○弇州園集弇州續集弇州別集共三百餘卷王世貞撰公字元美自號弇州山人有弇山園在州城內隆福寺前園之中爲山者二爲嶺者

一為佛閣者二為樓者五為堂者三為書室者四為軒者一為亭者十為脩廊者一為橋之石者二木者六為石梁者五為洞者為灘若瀨者各四為流杯者二諸巖磴澗壑不可以指計竹木卉草香藥之類不可以勾股計園畝七十而贏土石得十之四水三之室廬二之竹樹一之

崇明縣 在州東三百里

唐武德間吳郡城東三百餘里海中忽湧二洲今之東沙西沙是已宋初湧姚劉沙與東沙接壤建中靖國間又湧一沙於西北即今之三沙也嘉定

中置鹽場於姚劉沙號曰天賜屬通州海門縣元至元十四年始置為崇明州蔡景行有重建崇明州記其略云崇明為維揚屬州斥鹵衍沃中海而居非舟楫莫能到州境日為風濤蕩擊浸及理所至正十一年達魯花赤八里顏侯周爰咨度得地於州北一十五里曰東沙出海稍遠遂遷焉 國初降為縣改屬蘇州府弘治年置太倉州仍以縣屬焉○宋時有捕盜司在州治西扁曰晏然吏目廳在州廨左扁曰蓮幕俱州守任子明書○元至正中孟集知州事以東沙地不宜五穀民多懸釜

待爨乃置常平倉于州治南以時出入民無患饑
公暇之日讀書閱古著述甚富○幹王麟圖題三
沙詩鬱葱佳氣豁空濛天馭飛霞絢海紅萬象杳
冥惟見日九天迢遞更乘風人騎仙鶴上瀛渚山
引蓬萊出貝宮海外蒼生向誰理繡衣更過九州
東顧仲瑛和三沙宛在海當中隱見珊瑚樹色紅
神島出來連弱水樓船欲去引岡風東方日出佳
人國半夜潮生織女宮卻憶題詩繡衣使高秋曾
過玉山東鄭九成和三洲宛在碧波中海色晴霞
絢爛紅夜半鷄鳴先見日天邊月暈又生風鮫女

機絲花隔霧龍君城闕水爲宮誰持玉節尋真去
直過扶桑弱水東○志云長沙營在縣東北四十
五里海中明威營在縣治西之明威坊駕防倭船
于此沿海墩臺七十餘處巡簡司二元任元發海
洲夜景詩斷雲破月照沙洲水色煙光鎖釣舟鴻
鴈一聲驚客夢蓴鱸雙美動鄉愁紅飄樹葉霜天
曉白射蘆花海氣秋昨夜西風又吹冷天涯遊子
怯輕裘○奉聖寺在東沙唐貞元間僧道成建程
用招詩霜落平沙楓葉丹可人情思滿空山紅梅
瘦褪猶疎放山鳥驚猜亦往還孺子興同秋水遠

支郎心與白雲閒此時野寺題詩處昨夜穉寒湘
竹斑劉秩詩海國瀛洲別有天上人駐錫住經年
三花樹繞眠雲榻七寶池通繞鉢泉清聲響時晨
聽講名香爇罷夜參禪何時來問無生話喚醒人
問醉夢緣○王德卿祠在舊州學內公諱玉隱居
崇明門弟子受業者遠近不期而至卒謚孝友先
生王遙有遯送神辭○石郎廟在縣東南十四里
宋末風潮中有石人長二尺許隨潮浮至東鄉廣
慶橋下去而復來人異之立於橋側祈禱輒應至
元間達魯花赤道僧立廟祀之今遷葛家橋

西
北終

